

Isiginnaartitsisartutut ilinniartitaaneq pillugu Namminersorlutik Oqartussat nalunaarutaat

Isiginnaartitsisarfearneq pillugu Inatsisartut inatsisaanni nr. 23, 18. november 2010-meersumi § 11, imm. 3 naapertorlugu aalajangersarneqarput:

Atuartitsineq

§ 1. Isiginnaartitsisartutut ilinniartitaaneq Kalaallit Nunaata Isiginnaartitsisarfiata pisortaanit isiginnaartitsisartutut ilinniartitaanermi sulianut pingaarnertut akisussaasumit aqunneqarpoq.

§ 2. Isiginnaartitsisartutut ilinniartitaaneqakeqanngilaq, taamaattorli tak. imm. 2.

Imm. 2. Kalaallit Nunaata Isiginnaartitsisarfiata aalajangiisoqarsinnaavoq ilinniartut atortunut, atisanut isiginnaartitsissutitut, qalipaatinut pinnersaatinut il.il. namminneq killilimmik pisissasut.

§ 3. Isiginnaartitsisartutut ilinniartitaaneq suliatigut atuagarsornikkullu ilinniartitsinertaqarpoq ukiunillu 2-nik sivilissuseqarluni.

Imm. 2. Ilinniarnermut pinngitsoorani takkuttarnissaq piumasagaataavoq.

Imm. 3. Pinngitsoorani takkuttarnissaq pillugu, atuarunnaarsitsineq pissusissanillu iliuuseqarnerit allat aalajangersakkat erseqqinnerusut ilinniagassatut aaqqissuussinermi Kalaallit Nunaata Isiginnaartitsisarfiata aalajangersaavigissavai.

§ 4. Kalaallit Nunaata Isiginnaartitsisarfia ilinniartitaanerup imai ilinniagassatullu aaqqissuussinerit pillugit erseqqinnerusumik malittarisassiusaaq.

Imm. 2. Ilinniagassatut aaqqissuussinerit makku pillugit aalajangersaaviussapput:

- 1) anguniakkat, imarisat, ilinniartitaanerup ingerlanerani inissiineq piffissamullu tunngasut,
- 2) atuartitseriaatsit,
- 3) ilinniartitaanermi naliliinerit amerlassusii, ilusaat inissinneqarfilu aamma
- 4) merit

Imm. 3. Ilinniagassatut aaqqissuussinerit sapinngisamik Kalaallit Nunaata avataani isiginnaartitsisartutut ilinniartitaanernut naleqqussarneqassapput.

Imm. 4. Kalaallit Nunaata Isiginnaartitsisarfia aalajangersakkanit immikkut akuersissuteqarsinnaavoq taamaallaat Kalaallit Nunaata Isiginnaartitsisarfiat aalajangersarneqartunit.

Imm. 5. Ilinniagassatut aaqqissuussinerni ilinniartitaanerup ECTS-pointinut tunngasortai taakkartorneqassapput.

Ilinniartussatut tiguneqarneq

§ 5. Isiginnaartitsisartutut ilinniartitaanermut tiguneqarnissamut misilitsitsisoqartassaaq. Qinnuteqartup piginnaasaanik naleqqussusianillu naliliineq malillugu Kalaallit Nunaata Isiginnaartitsisarfia tigusinissamik

aalajangiissaaq.

§ 6. Isiginnaartitsisartutut ilinniartitaanermut tiguneqarnissami piumasaqaataavoq qinnuteqartoq

1) 18-ileereersimassasoq aamma

2) tiguneqarnissamut misilitsinnerminik angusisimassasoq, tak. § 7.

§ 7. Kalaallit Nunaata Isiginnaartitsisarfia ilinniagassatut aaqqissuussinerni tiguneqarnissaq pillugu erseqqinnerusumik malittarisassiusaaq.

Imm. 2. Malittarisassani ilaatinneqassapput:

1) ilinniartitaanermi ilinnialernissamut tunngaviit,

2) qinnuteqarnermi akuerisaanermilu periusissat,

3) naliliineq aamma

4) immikkut akuersisinnaaneq naammagittaalliuuteqarsinnaanerlu.

Soraarummeersimanermut uppernarsaatit

§ 8. Kalaallit Nunaata Isiginnaartitsisarfia ilinniakkap naammassineranut uppernarsaasiisarpoq.

Uppernarsaatip minnerpaatut imarissavai:

1) Ilinniartitaanermut tunngasut ECTS-pointinngorlugit aamma

2) Ilinniareersimasat ilinniakkamut allamut nuunneqartut ECTS-pointinngorlugit.

Imm. 2. Ilinniartut ilinniarnerninnik taamaatitsisut ilinniakkamik naammassisartaanut ECTS-pointinngorlugit uppernarsaammik pisinnaatitaapput.

Aalajangersakkat allat

§ 9. Kalaallit Nunaata Isiginnaartitsisarfia ilinniartup pilersitseqqartutut piginnittussaataitaanera ataqqillugu isiginnaagassianik ilinniartitaanermi suliassat suliarineqarnerannut atatillugu pilersunut piginnittussaataitaavoq, taamaattorli tak. imm. 2.

Imm. 2. Suliassap suliarineqarnerani Kalaallit Nunaata Isiginnaartitsisarfia avataani susasaqartut, taakkununga ilanngullugit suliffeqarfiit, sullissiveqarfiit il.il. ilanngutsinneqarpata Kalaallit Nunaata Isiginnaartitsisarfia, ilinniartup allallu pineqartup akornanni isumaqatigiissutigineqassaaq Kalaallit Nunaata Isiginnaartitsisarfia, ilinniartoq allalu pineqartoq malittarisassat pilersitseqqartutut piginnittussaataitaanermut atuuttut ataqqillugit isiginnaagassianik suliassamik suliarinninnermi angusaasunik qanoq annertutigisumik atuisinnaatitaanersut, tassunga ilanngullugu allamut pineqartumut tunngasut pillugit paasissutissaasinnaasut tamanut saqqummiunneqarsinnaanersut.

Atuutilersinneqarnera

§ 10. Nalunaarut 1. decembari 2011-mi atuutilerpoq.

Namminersorlutik Oqartussat, ulloq 14. november 2011

Mimi Karlsen

/

Lise Lennert Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut